

Kántan Inacha'igen Fañomnåkan 2021
Inacha'igen Fino' CHamoru Fañomnåkan 2021 Theme
I Fino' CHamoru: Gi Pinadesi, CHinatsaga, Hinemlo' yan Pås

Betso 1

Tufong kuánto na minappot manmåtto
Ni ta mesnguni sin embåtgo
Taka' tåddong gi kurason-miyu
Ya en sedda' siempre na gåtbo

Gi sinappet ta susedi magåhet
Lao estague' hit på'go ai långhet
Na ta gogosa månu hit siña
I lina'lå'-ta para ta abiba.

Betso 2

Ti ta miresi i pinadesi
Lao un dia u ta agradesi
Sa' nina'metgot hit na kottura
I rastro-ta kulan mohon pintura

Mana'unu hit na estoria
Kadakuåt siha na memorias
Un litråtú ni gof annok klåru
Hågu yan guåhu.

Betso 3

Disde i nana gi halom guma'
Esta i tata ni gaige gi che'cho',
I famagu'on siha gi halom eskuela
todus ha' hit yini inafekta.

Håfa hit ta cho'gue? Lao ta akseptá.
yanggen ta na'lamafñot umagotte-ta
ya ta na'fitme i hinengge-ta
u ta hulat i tiempon chinatsaga.

Betso 4

I tano'-ta ti dånkolo na lugat
Na'piniti yan ta hungok fotmåt
I taotao-ta ni manma'espitåt
Kulan yinilang trankilidåt

Ta tåtanga na para u guaha siñåt
Ya ta na'såonao tinayuyot-ta,
Yan i tinaitain i familian-ñiha,
Hinemlo' para i tåotao-ta.

Betso 5

I sepblan minalångo,
Kulan mohon sopblan påkyo pat gera,
Gi dinanña' guaha hinemlo'
Hita åmot-ta guini na manera.

Sien mit miyas na problema ta upos,
Lao ta falågu sien mit miyas mås,
Ta igi i chinatsaga yan pinadesi,
Ya u ta sodda' i hinemlo' yan pås.

Lyrics written by J. Franquez and R. J. Barcinas ©2021
Music used by permission by Johnny Sablan ©1970